

Transkription von Stadtbucheintrag HBS 1378n

Ort, Datierung: Halberstadt, 1378-??-??

Signatur: Stadtarchiv Halberstadt, X 01, 6v

Inhalt: Rat der Stadt Halberstadt: Ratsverordnungen (Lichtvorschrift, Kornvorschriften etc.)

to vns(er) vrouwen dage /

malk schal syne gheste wol handel(e)n nv to vns(er) vrouwen dage vm(m)e ere pen(n)i(n)ghe vnde late sek de wol be[...] /

jowelk see wen he huse edir heghe dar he vorantworden den wille vnde malk de warne syne gheste dat se / na der lutteken klokken nicht vppe der strate gan ane lûchten . wanne vnse h(e)ren de Burmeste(re) de wille(n) des / auendes vm(m)e gan we dat andirs halde den wolde(n) se hinde(re)n /

Neymant schal korn kopen bute(n) der kedone Ok enschal neymant korn kope(n) eir de schilt af genome(n) w(er)de /

Neyn werd schal korn kopen mit eynes ghaestes pen(n)i(n)gen , Ok en schal neyn gast korn vppe dem markede / kopen welk gast ok korn vppe dem m(a)rkede kofte dat enscolde neyn borgir in syne(n) hûse mete(n) laten /

Ok wille(n) vnse h(e)ren dat hir neyn gast weddir den ande(re)n gast kopen scal neynerleie kopenschap grot / edir kleynen noch neynerleie gud sundir in dem jarm(a)rkede dat schal jowelk wert syne(n) ghaeste dortlik don / welk gast nv bin(n)e(n) dat andirs heylde de scholde dat vns(en) h(e)ren weddir don vnde de werd in des hûse de / kopenscap schege de scholde eyne loedige m(a)rk gheue(n) dar wolden vnse h(e)ren neyne bede vm(m)e liden /

It enschal neymant begheiten vor vnsir vrouwe(n) dage der latirn , Jt(em) enschal neymant nÿghe molt brouwen / vor sente michael(es) dage /

We ok korn to dem m(a)rkede bringet it sÿ hafere edir andir korn de schal it reyne maken we it vnreyne / bringet dat wille(n) vnse h(e)ren vt der stad wisen laten /

It en schal neymant by lichte laten dersche(n) /

Ok wille(n) vnse h(e)ren dat neyn gherude edir scherre schulle(n) meste swerde noch neynerleie were dragen /

Den Jodden de vppe der stad gude wone(n) scal neymant neyne ouerlust don . noch den vrouwe(n) vppe dem poyle /

It enschal neymant de holttempne vnreyne maken , vnde neyne heymelicheit , noch mestekosene dar vp buwen / noch neyne(n) poel , edir mes , dar in dragen noch schafen , we it dar enboue(n) deide de

scholde eyne m(a)rk gheue(n) /

Jt enschal ok neymant de brotscherne(n) vnreyne maken , wen men dar ouer betrid , ysset eyn alt , he
schal / dreÿ dage in der deÿfe stocke sitten , ysset eyn ju(n)gh den scal me(n) to der stûpe slan /

Deme glik beide(n) vnse h(e)ren vm(m)e de vleisch scherne(n) , vnde vm(m)e de steÿne , dat der
neymant vnreyne make / dar entwischen , we dar ouer betreden worde deme scholde men volgen mit
rechte /

It enschal neÿmant mit stro decken noch myt schindelen we ok dar reyde mede decket hebbe de schal /
dat aff don eir me(n) dar gr(ote)n schaden van neme we dat so nicht toheilde den wolde(n) / vns(e)
h(ere)n volg(e)n myt rechte /